

四庫全書

集部

欽定四庫全書

弇州四部稿卷三十八

明 王世貞 撰

詩部

七言律九十二首

肖甫自江北移滇臬走使以詩見問賦此奉答

七子翩翩共鄴游
座中君豈減應劉
浮名顧影驕堪失
拙宦藏身老漸收
望裏使星移益部
書來春雪滿揚州

故人淪落無須念未死能寬薜荔愁

寄袁抑之鴻臚

汝向句傳領百僚予留滄海伴漁樵風霜共飽誰終耐
日月如私未敢驕地遠鱗鴻甘寂寞天空鵬鷃各逍遙
相逢莫責元龍禮豈有山人愛折腰

諸生錢叔寶再乞詩贈寄王司徒

共道司農領罷來至今風采映吳臺車門文舉無勞刺
館客長瑜未肯迴我自江湖容抱疾即從霄漢見憐才

諸生但許青萍在會有雄光傍上台

寄明卿

十月吳天未授綿林田如雉計茫然已從鄰父求籬菊
復有江州佐酒錢醉裏舊游時自語廢來狂疾不須蠲
中原兄弟如無恙大可漁磯穩晝眠

懷王參政明輔

公舊與僧
伴松見過

伊昔春星過草堂使君袍紫客袍方拈來是法誰真解
語到無言味轉長掌裏蓮花堪入藏眼中棠樹已成行

何時向子粗酬願一鉢相從太華傍

謝汪伯玉中丞惠衣

蓬門生事漸蕭騷望裏驚鴻首重勞鄉地豈應無縞帶
故人殊自有綈袍青陽忽冒寒雲轉白雪遙令瘴海高
却笑古來中散癖可能容易絕山濤

謝伯玉中丞見遺經像

白馬招提紀漢年即看經像震方傳翻時貝葉雲俱潤
禮罷蓮花月並圓老去一龕居士業悟來雙夾宰官緣

靈山倘是相逢地莫忘金篦導我前

送陳子兼憲副起任滇南

十載悠然卧草廬忽從天上見徵書歸如圓月難終晦
出似浮雲偶自舒驄馬霜清炎海路碧雞星引使臣車
莫言回首長安遠聞道山公已奏除

袁黃州履善過訪

社酒寒燈黯自親十年天地各風塵羞將白雪供歸計
忍向青山問逐臣半刺不妨銜裏舊二毛俱訝夢中新

柴門蠶犢堪驅使莫為明時歎隱淪

贈寄王山人山人時參邵將軍軍事

丘壑居然自不羣江東諸少總輸君詩中畫是寒林色
酒後文憐日暮雲聞道衛青容揖客可知王粲樂從軍
功成最好歌饒吹倘借梅花一寄聞

送周中丞允文遷撫江西二首

毋驚兩地德星頻漢主能褒社稷臣飛鳥遂為今賜履
攀轅應是舊埋輪

公舊為貴溪令以侍御按三吳有功遂遷今官

水從彭蠡連

吳潤山到匡廬帶楚新此去定過徐孺子草堂虛左為
何人

其二

聞公移鎮古洪州童稚驚呼父老留一疏吳天迴菜色
十年滄海捲鯨流江雲對擁中丞節山雨長飛帝子樓
共道衮衣多佇望不知何地更東周

元日試筆

朝來四十俄加一懶散歸人傍俗過地僻中原春雪少

時清吾黨歲星多年光似覺偏湖海物色那能到薜蘿
回首舊游饒感慨五侯驕馬自鳴珂

立春前一日雪

曉色千林起倦鴉卧驚飛雪點牕紗今朝殘臘猶堪瑞
明日逢春恐是花沾處漸憐駕翬薄舞來還傍翠樓斜
總饒郢客無新調未許東風媚謝家

贈殷邑博

以孝行起
貢授官

寧勞一第著賢聲三府曾看有特旌經術肯為秦博士

孝廉先冠楚諸生青衿客誦居平節銀管人書異日名
最是宦餘堪眺訪延陵祠畔暮雲橫

初春飲張氏伯仲園皇甫子循以疾不與貽詩見
豔未及造訪先此有答

三徑時容二仲游坐中江左半名流還因善病遺玄晏
敢為論交薄太丘明珠寒何處得陽春句好竟誰酬
亦知違世非君意無那輕陰攪獨愁

君時方
有外侮

久不得于鱗書書到得新詩數章喜而有作

莫恠君書不易成書成練筆太縱橫
僊桃要結三千歲和璧須償十五城
老去轉多飛動色病回猶識和歌聲
吳門白馬空如練草色中原未可行

送歸熙甫之長興令

淚盡陵陽璞始開一時聲價動燕臺
何人不羨成風手此日真看製錦才
若下雲迎僊鳥去雲中山擁訟庭來
莫言射策金門晚十載平津已上台

其二

墨綬專城可自舒應勝待詔在公車
春山正好時推案
化日何妨且著書
到縣齋宮留孺子
詰朝車騎請相如
客星能動郎官宿
白雪陽阿興有餘

子與時在邑與
熙甫善故云

海鹽鄭大司寇

十年封事爽鳩多
總為憂時鬢早皤
天地祇看容一柱
風霜不遣夢三禾
懸車坐領青山色
扣角閒為白石歌
共道履聲明主識
璽書何日下烟蘿

奉挽大司寇長興顧公一律

屈指流年釣渭餘累朝耆德竟誰如揮金疏傳寧因酒
辭印虞卿祇為書喬木尚存司寇里生芻欲挽府公車
莫將伯道論天道千古高名總未虛

承明伯文學存叔鴻臚見訪余兄弟不值有作

得歸三徑未全蕪偶乞扁舟問五湖客到可緣嵇喜在
主貧應避呂安無江頭東楚憐終鮮谷口遷鶯念友于
總為德星難便聚望來搔首重踟蹰

過華大作

高柳垂絲拂徑苔入門青眼便應開
墨留張史雲烟字茗出嵇生沆瀣杯
不獨君齋千古色亦知吾黨異時才
臨岐最愛湖頭水為許浮家易往來

過華二作

君家釀色何所似為似君圃千琅玕
和風細吹若下皺白雲不散瀟湘寒
即無嵇阮能自入倘許求羊時與懽
應道醉來容易去柳烟花月夢中殘

今年三月朔舍弟山池紅梅未謝玉蘭盛開乘興

有作

堂北玉蘭開太早堂西紅梅落故遲
露盤乍映金狄掌
如意未擊珊瑚枝
流霞迴雪態爭出
月墮風清愁自知
為報江妃長倚醉
阿環相見莫相疑

贈邵都閫遷惠潮參將

長聞借箸參戎幕始見移營出瘴沙
鯨島夜嚴千舸月
羊城春散萬人家
將軍別詔師橫海
天子新名縣獲嘉
莫惜斗來金印大
功成看取鬢邊華

寄翁中丞

屈指當年意氣看，惠文霜在尚堪彈。
時平越海龍能卧，政就吳山虎不冠。
幕府嚮開歌蒨晚，故人差健浣花寒。
中原自憶商巖雨，春色浮雲處處殘。

王太史與余奕負余錦文牋，余負一詩扇。
賦此促之。

學士長楊賦早傳，偶來花下醉江烟。
亦知芸管春秋癖，應有苔文側理箋。
我自戢山慚逸少，汝將淝水制張玄。

莫言田父衰仍拙曾記宣城賭郡年

即事效長慶體

一春文事頗從容約畧鶯花不負儂
酒戶消來甘下則書家老去任偏鋒
齋時自托闍黎鉢飯罷閒敲窳堵鐘
唯有山僧知此趣雨前茶綠解相供

答張二見父

病間初寒薜荔裳懶將交誼許君房
清湘字到新魚素令弟詩成舊鴈行
老去五噫歸震澤春來九辨起飛霜

相看共有池塘思濁酒何年兩對牀

其二

玉樹霜風竦漢京曾將冰檠擬難兄誰言國士無雙外
重見君家第五名

見父棄其
業業詩

句好吹簫誇仲氏材高結

襪為王生他年倘過吳趨里薇蕨秋江傍汝烹

張幼于見示新集因寄

集中有二君
篇七子行

才子紛然滿後塵吳門紙價為誰新即看明月雙投句
也自陽春寡和人剖後荆山元有淚授時湘浦不無神

莫嫌雲樹滄江晚濁酒青燈好細論

贈周公瑕應尚書朱公聘脩河功志

東隄諸侯走傳車吳門春色動衡廬俱言水土司空畧
第少河渠太史書錫後玄圭誰更許沈來白璧未全虛
征途好寄宣房頌知是文高覽勝餘

王百穀半偈齋

婚嫁由來不累人何勞捨宅學王珣經壇如意花能雨
梵夾香鑪葉自塵空後已無生滅法現來元是淨名身

從君且乞楊枝露夢裏金莖恐未真

王嘗有浩然之直頗以淪落為感

舅氏劉掾自剡歸於林廣文者未展高陽之歡急
難中忽承推食得遂生還感激之極特索余詩為

報

自逢劉掾罷官年慷慨時時說汝賢入剡未營安道宅
歸吳翻割廣文羶憑陵俠骨千秋起遼落窮心徑寸懸
莫道相酬無玉案郢人能重郢中篇

送王百穀奔袁相公喪

丞相輒旌返故鄉南州絮酒自殊方龍泉且挂曾彈劍
雞舌還焚舊辦香辭趙連城空自許到吳流水為誰長
他年更有羊曇慟玉樹誰家覓謝郎

袁無子故云

支硎訪陸叔平

握手無論相見遲江東耆俊總看誰君深綠綺絃中語
我愛藍田畫裏詩旋收礪溜供茶鼎更遣春山佐酒卮
臨別為言堪憶處嫩篁新月坐天池

王明輔寄示關中諸君集有答

寄來名筆總西京讀罷翻然俠思生紫閣雲疑偷華色
黃河水約帶秦聲未煩吾黨絃驚絕依舊人間正愛鳴
渭北洮東千萬里五言何地起長城

郡丞陳侯晦伯博雅於今無二與余傾蓋輒遂綢
洽茲以量移得南戶曹不勝離析之感情見乎辭
文酒時時枉敝廬忽從天上見徵車青州我竟老從事
白下君今行秘書霜後折蘭交恨晚道傍騎竹意難虛
嚴公倘許仍分綬遮莫花溪自掃除

其二

柴門朝色動干旄，念汝談天辯轉豪。
星氣忽寒離後劍，月光應鑒夢中刀。
長干騎過停金縷，采石舟迴映錦袍。
共道古來人物志，至今猶自屬倉曹。

中庵上人結庵當虎丘之半賦此贈之

法護金田故不慳，何須更買沃洲山。
精藍半割雲霞表，飛錫長留天地間。
花裏閉關中酒倦，柳邊攜榼施茶還。
亦知身世元無染，為擬醫王跡未閒。

奉送泉州守周師改郡赴京

露冕閩江惜別遲，尊鱸已慰故園思。
曾沾父老攀轅淚，親領君王保障辭。
病間可容長孺卧，政成還與細侯期。
它年夢裏三禾失，總道功名治郡時。

病後問子與

布帽春逢思轉孤，祇饒身在各江湖。
歸時五馬今餘幾，病後雙魚肯念無。
留客可仍傾若下，著書應否號潛夫。
如論庾信窮愁骨，總得秋風也未蘓。

九日汎舟靈巖以病且雨不克登有作

伏枕移船秋色來
秋山空抱碧崔嵬
乾坤總負登高意
風雨難私濟勝才
誰遣紫萸供獨笑
祇應黃菊背人開
欲知游賞俱陳跡
吳越雙留萬古臺

答抑之鴻臚問疾

高枕青山蘿席寒
舊游天上慰加餐
身同狗馬元甘病
歌到龍蛇且自寬
萬事窮途偏阮籍
幾人公望似袁安
當年九畹曾分佩
蕭颯商秋尚未殘

張公洞懷李于鱗

李生昔登西嶽峰
泚筆題我金芙蓉
豈謂姓名榮二華
祇憐風雨失雙龍
燕中舊社人人筑
吳下諸山處處筇
石髓總應今日有
可堪中散不相從

游善權寺僧云距長興可兩舍因懷徐子與

共識菰城指掌間
跼蹐尊酒未堪攀
絃中孤鶴冷然去
鏡裏浮雲杳自閒
晝畫溪分一湖水
兩邑各有晝畫溪通太湖
賣茶

人共兩興山相知
莫笑王猷懶安道
于今善閉關

送太倉唐倅之桃源令 唐全州人

自識量移帝寵新，莫因才大歎沈淪。
家隣湘水元通楚，官是桃源不避秦。
花裏鳴絃千嶂色，月明飛鳥萬家春。
蘭臺倘語登高事，唐勒應誇賦有神。

閏十月朔病中作

伏枕人間萬事輕，偶探殘歷喚愁生。
初疑玉殿仍頒朔，不謂玄冥再主盟。
病似黃楊多進退，情如芳草易枯榮。
誰憐止酒無多睡，夜夜清霜閏五更。

雲上人講經造塔見過索詩

吾師慧福悟來深卅字從胸衆所欽
趺坐俄成水月觀
翻經忽動海潮音
塔因聽法名多寶
田為酬恩字布金
功德總高何所冀
翛然一鉢下叢林

周公瑕登太山自于鱗所歸歲暮訪病夫海上有
贈

歲晏寒扉傍日開
江昏獨棹溯波來
還因東海雲霞至
似挾中原岱色迴
萬事何人憐伏枕
千秋無恙起銜杯

寧論我退君能進屈指重看御李才

酬張幼于對雪見懷之作

雪後柴門跡未新誰將尺素走陽春
應憐短棹山陰客共是朱絃調裏人
超暝樓臺同氣象濯風梅柳且精神
相知莫笑多高枕懶病袁生不為貧

王太史元馭奉使東歸移疾得請詩以問之

丹書玉節下青霄擁傳春風故里饒
不為馬卿金掌露欲觀枚叔廣陵潮
荷衣半入天香煖藜杖初分社火遙

見說蓬壺元咫尺可將僊骨伴漁樵

重登金山作

春山春望鬱蔥哉矯首扶桑黛色開滄海潮吞丹鷲去
大江天捲白龍來憑陵不盡千秋語遼落長悲六代才
為喜摩尼施珠在振衣還上妙高臺

其二

蒼藤絕巘鎖丹寮忽有鐘聲至次寥萬堞對分天塹色
千檣爭上海門潮雲低鴈鷺行時斷日落龜鼉卧轉驕

屈指舊游君莫哂十年吾豈愧漁樵

山東道中懷于鱗卻寄

強欲彈冠塵黯然懷人初就北征篇大王風自乾坤滿
高士星仍海岱偏九畹經時芳不負連城欲暮好誰憐
山樓念汝須相遜白雪春來恐廢絃

早行河間道中

夜闌雞鳴不掩關清霜作絲塵作顏春星馬首時欲墮
桃花屋頭未暇攀居人自歌棗纂纂行子頗畏車班班

瀛州城北半陂水
羨汝沙鷗相對閒

張山人會於予相芙蓉館十五年矣予相物故且
八年而予以伏闕會山人山人贈予以詩不勝懷
舊之感因賦此為贈

伊昔邇溝舊草堂
芙蓉葉是美人觴
十年長恨山陽笛
此日仍懸孺子牀
我自覆盆希日月
君能吹律轉冰霜
相逢莫作風塵語
少室三花春正長

戴錦衣伯常過訪

衡門草色遠相尋握手登堂意氣深天地爾曹仍緩帶
風塵吾黨合抽簪猶餘廣柳車中淚誰問陵陽石裏心
但使臭蘭長不負莫從鴻鯉論浮沉

戴先兩書不達

城南飲邵憲使道徵用舍弟韻

抱病風塵敢自安欲歸杯酒暫相寬誰憐尺五瞻天遠
且唱尋常行路難句裏芳蘭留作佩江南新穉好為冠
太階星斗時時合綵筆于今未可干

莫大夫子良起參梁藩入賀登極有贈

蚤辭簪紱偃林扉總為蒼生願不違一出雲山無豹隱
百年天地有龍飛雞聲帶月催長樂鳧色占星倚少微
最是五湖饒釣叟從君乞取舊荷衣

答贈蘓鴻臚瀛

病後時才屈指空尊前青眼暫相同家聲自識中郎將
詞筆重歸小許公宦就承明新漢月篇成東海舊齊風
知君豈少河梁思翹首南天有斷鴻

寄耿中丞子承

黃龍東去海雲低
立菟城頭烏夜啼
帳下青羌新屬國
軍中白馬舊安西
牙旗月擁諸陵出
甲帳天迴萬堞齊
最是駝酥爭捧處
不妨飛捷醉中題

遇邵憲使道徵作

使者春風白接離
不教霜色染緇衣
初疑少室花間度
忽憶梁園雪裏歸
北極冠裳多氣色
中原詞賦有光輝
夾池脩竹依然在
回首風塵幾是非

邵莫二大夫朝天歌

喧喧符傳指天津共道衣冠禹會新過嶽嵩呼催玉節
入朝雲色擁金輪來時並訝占星瑞宴罷雙歌湛露仁
自是乾坤多涸轍不將餘澤潤波臣

春郊漫興

短裘仍為酒家留且傍春風緩獨愁南陌柳長誰贈別
東林花落始成游窮來畏客論時事醉裏逢人諱故侯
若道野夫歸後興白雲爭向五湖流

歸思

一疏高天聽肯卑春程日日改歸期躬如韋杜長宜曲
跡似湘山盡可疑鷓鴣欲傳何地語辛夷偏發故園枝
朝來短髮猶堪把懶向青銅問幾絲

贈王子亮勳且招之

歷落風塵意氣孤即看人世滿窮途寧因久客輕彈鋏
縱得微官忍濫芋家遠并州成故國身閒魏闕有江湖
相逢未少衣冠態且向城南伴酒徒

題寺壁

脩然落日在庭梧病骨經年藥懶扶身退不妨成遠志
路窮誰與贈文無逢將怖景真同鴿參得禪心已是狐
總為人天多眷屬欲捐衰鬢事浮屠

仲子仁罷官後出訪善果寺有作

握手招提旅思停即看鴻色遠冥冥十年鬢向長楊白
一疏山從樵李青寶地重逢今作雨金門不遣歲為星
清尊莫恠頻傾倒我亦風塵未敢醒

寄許殿卿相國

設醴君仍上客行和歌予但酒人傍中原劍色寒相慕
獨夜琴心惋自傷賦就三春梁苑雪書成五月薊門霜
唯餘徑寸煢然在岐路人間未可量

戴伯常錦衣攜酒蕭祠貽詩見贈未能報訪聊抒
此答

蕭祠叢栢迴成秋麈尾談天竟日留一代文章誰正始
百年樽俎見名流君停杜曲花間騎我學山陰雪後舟
不是子猷能盡興帝城風雨使人愁

答仲子見問

竄跡空齋廢蓼莪間行孤影傍湘羅官同蟻穴功名淺
身比鮫人涕淚多未死烟霞終自若不羈天地奈予何
十年厭聽君房語念爾今拋白玉珂

問仲子歸期

蕭然襆被出詞垣時復持螯佐酒罇為問淹留滄海楫
可能供奉茂陵園畏途冠蓋誰終老清世漁樵也自尊
何限吳山秋後色好憑雙屐過閭門

伏承御史院王大夫再損肴醴之貺聊抒短句情
見乎辭

薊苑花飛奈客何
蒯緱無恙始成歌
恩深越石知難報
餉愧山濤得已多
鐘動不將僧飯乞
樽開漸有酒人過
青雲豈少高陽侶
回首那能問薜蘿

醉中贈山上人

已覓苾芻為酒客
還依蘭若築糟丘
青山看罷無他事
黃卷拋來且自由
六欲界中須讓醉
四禪天上始寬愁

狂夫偶作狂顛語不道生公石點頭

午卧

亭午疎林黃鳥聲此身雖卧夢還驚才名未了浮生事
蹤跡空關異代情天濶冥鴻雙倦色途窮老驥一悲鳴
艤符擬趁江梅水可待尊鱸喚步兵

陳司理公與余有國士之知二紀餘矣其猶予太
史君會於薊門始成此寄

曾沾拂拭與羣髦回首垂髫已二毛斗色舊為雷煥劍

風塵今愧呂虔刀，峰過衡嶽鴻偏晚。
水入湘江鯉更勞，不待薊門逢玉樹。
久知賢叔似山濤。

其二

病懶青山意自如，頗慚文似負吹噓。
無論孺子曾懸榻，猶憶中郎舊授書。
茂苑棠成初惜蔭，武陵花發不通漁。
吳歌敢作陽春擬，祇是酬恩一寸餘。

贈臨淮李小侯

誰是平陽第一勳，五陵裘馬盡輸君。
雕弧甲夜彎秦月，

彩筆商秋犯楚雲樂府爭傳都尉句孤兒別屬子侯軍
他年自掃燕然石不待班生為勒文

君有楚集

題半華山房

端合圖君丘壑間能從郭內買青山峰陰欲借蓮花掌
海色疑分玉女鬟倚檻浮雲生浩漭當階明月寫潺湲
相看但少求羊過不為藤蘿易掩關

倪舍人八十有三矣猶能跨馬見訪招提贈以佳
句第用賜環為慰差非鄙懷聊抒奉答

紫薇舍人冰玉姿躍馬看山猶未衰生平頗詫和郢句
此日見為招湘辭世才沾沾足自喜余髮種種奚能為
明年物色五湖畔却挂羊裘君始知

贈封君雷翁

新壓烏紗鬢未皓不煩清醴自成醅匣中霜是豐城舊
架上芸抽酉穴多草罷玄亭長自掩花時籃輦故人過
如聞聖主臨雍日鳩杖來扶白玉珂

同舍弟敬美真上人游大佛寺遇雨作

飛鷺岵毳傍紫冥坐來煩暑入清泠千山忽掩風雲碧
雙眼偏留薜荔青簷鶴過雷時自墮鉢龍旋雨暗聞腥
深杯但至毋論數慧遠於今也不醒

貽王百穀

王郎風調好誰倫手裂軍繻再入秦雅有暮雲橫碣石
絕憐春色散平津絃中白雪寒相語鏡裏清霜曉自新
我欲東歸君且住豈無能誦子虛人

秋日王百穀康山人朱在明過庵居分韻得來字

雙眼柴門偶自開，鏗然履齒破蒼苔。
秋驅北極浮雲盡，客與西山爽氣來。
坐久雨花時點席，歌清風葉暗侵杯。
相看共是江南侶，不為尊鱸興已催。

贈朱鴻臚在明

翩翩裘馬自聲華，率爾高陽興未賒。
白苧裁教周小史，青萍脫贈魯朱家。
書成上苑容棲樹，夢就中山欲吐花。
莫以故人堪入洛，只今秋思滿天涯。

君贈詩以
二陸見擬

方德新侍御見訪分韻得蓬字

十載風塵意氣中
劇知傾蓋解相同
朝陽此際多鳴鳳
野父由來不避驄
出匣星文欣自吐
當樽風色為誰雄
君看萬里比隣在
把袂毋勞歎轉蓬

尋當遠別故云

贈范禮部

材美東南信有餘
士龍名下更無虛
蒹茅親定句陳禮
袖草時存諫獵書
異日三禾應自協
于今八米許誰如
江湖豈必論同調
未擬新詩一起予

過德州不及訪于鱗有寄


渭河新水淼漫漫東望踟躕思萬端我自可無衰鳳歎
君今仍作臥龍看歸鴻落照鄉心劇立馬浮雲岱色殘
豈是剡溪偏興盡古來天上聚星難

其二

北風吹土染征裘岐路安期可自由足練轉深吳馬色
千金不散鮑山愁青萍合日方為劍白雪寒時獨倚樓
最好漸圓新夜月片帆無賴下揚州

暮發邵伯驛作

平楚黃勻綠尚饒漸來秋思未蕭條烟低邵伯當年埭
月出揚州第幾橋桃葉渡時那用檝桂花叢處不須招
欲知無限窮途感才聽吳歌半已消



弇州四部稿卷三十八

欽定四庫全書

集部

弇州四部稿卷

三十九
四十

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官中書_臣張垣

謄錄監生_臣黃永澄

欽定四庫全書

弇州四部稿卷三十九

明 王世貞 撰

詩部

七言律九十一首

余與南海歐子相慕久矣北歸過維揚訪余舟次
喜不自勝投詩見贈且多勸駕之語惜無何遂別
情見乎辭

維揚楓葉逗行舟
塵尾立言欲少留
任是觀濤無起色
還因招隱失窮愁
中原劍在寒相問
南海珠成暗莫投
豈為身慚羊叔子
邀君不遣過瓜洲

殷無美下第

一賦河東若有神
忽驚風雨失龍鱗
暫收三寸囊中穎
仍作諸侯幕裏賓
掩鏡清霜俱是恨
拂絃流水為誰新
長干夾道青樓眼
愁絕烟花夢後身

題潘中丞留餘堂

中丞卜築雲川陰蘿薜春深好易尋長將不盡還天地
別有無窮待古今門可容車寬自得庭堪旋馬意何深
江湖總是相忘處知爾元無竭澤心

于鱗赴浙臬邂逅吳門有贈凡四首

十年龍卧杳難尋握手相看思不禁天上客星聊作使
人間舊雨復成今地過瓜步風烟軟潮滿胥江月色深
鵬鷗逍遙俱自得肯將踪跡論浮沉

其二

樓船金鼓殷如雷
憲府春當海國開
西嶺白雲推案出
中原紫氣渡江來
翛然自喜千秋事
去矣誰當一代才
今夜吳閭寒更好
最憐分手各登臺

其三

知君偃蹇故金魚
除目何當問草廬
不必齊謳稱獨行
于今越絕有新書
離愁明月杯堪失
懶病青山枕自如
醉後蕭條還四望
浮雲終古卷能舒

其四

徵君姓字動青霄
綵筆寒迴氣象饒
出後東山仍遠志
見時滄海失陽鱈
風塵偶貸嵇康懶
春雪還堪宋玉驕
寮佐祇今多後進
誰將傲吏憶先朝

贈郭開府帥南粵

虎符金印出長安
主聖連登上將壇
百粵旗開魚鳥色
三吳劒奪女牛寒
帆檣帶日雄爭舞
組練銜雲靜不譴
君去浣花花自發
誰堪小隊駐江干

送別吳樞季使君遷府倅一首

濟上風塵蓋始傾即看雄劍氣崢嶸異時陳紀猶難弟
今日吳均不愧名政就棠陰移大府才高壁月掩連城
干旄陋巷仍堪過惆悵浮雲暮已橫

君舊省伯子峻伯
濟上實定交焉

吳使君邀飲沙頭梅花下得揚字

使君露冕春行部忽對梅花喜欲狂積素乍為瑤島色
輕紅不散壽陽妝停杯雪緩千林暝拂袂風沾十里香
况是新篇饒藻逸法曹那敢擅維揚

寄朱鴻臚在明

長安車馬逐芳菲可向天涯歎滯違
名就不嫌方朔醉
官貧肯學曼容歸
青山是處江南色
白雪從他薊北飛
若問故人丘壑事
于今戰後頗能肥

答寄王百穀

似因留滯愛蓬蒿
書到蕭條感二毛
田父只歌將進酒
主家誰問鬱輪袍
齊中落日塵蒙偈
澤畔浮雲句反騷
自是不才能世左
敢容孤枕向人高

戚大將軍入帥禁旅枉駕草堂賦此贈別

初聞小隊駐吳江，忽漫花溪隱畫艘。
細柳尚虛金鎖甲，前茅時緩碧油幢。
南中舊部思馳義，塞上新城喜受降。
倘寫雲臺須第一，如論國士總無雙。

史德充少府嘗從姜都督夏州尋官於閩從戚大將軍破島寇有功當遷會失用事者指為王官不赴放浪江湖間謁余海上漫成此詩為贈

看君雙頰話時紅，憔悴功名耻衆同。
曾逐虎頭歌出塞，卻依龍頤試乘風。
朝端綠盤論兵左，橐裏朱提借士空。

總為王門裾懶曳
李鷹新號醉江東

答用晦王孫

朱邸春風玉軫閒
能將流水落人間
毋論帝子開高閣
別與書生賦小山
南極斗寒雙劍在
大江天濶片鴻還
亦知七略君家有
夜色青藜未可攀

寄余德甫聞有盜警

自爾巾車返豫章
蕭然五柳似柴桑
江秋月隱芙蓉佩
山晚雲歸薜荔房
身在青氍毹不惜
酒酣黃犢坐何妨

飛揚總為千年事
鄴下狂名已鴈行

送龍司理被徵

初聞循吏賜黃金
旋見徵書入禁林
別日秋霜飛旆滿
異時春雨訟庭深
朝廷豈少批鱗事
湖海能無諫獵心
此去君名高扣閣
不妨予計老抽簪

寄濟寧朱公

十年蓬累卧江東
兩見脩鱗濟上通
天畔星為中執法
人間水屬大司空
樓船畫集沙河雨
壁馬秋歌瓠子風

轉餉自來勳第一璽書何日未央宮

春事

卽論春事未闌殘病間尊罍好共寬東第花神時爛漫
西園竹使日平安浮雲不礙烏皮几細雨偏宜紫籜冠
自廢祇緣孤癖在將無人擬素封看

對花憶舍弟

恒時泉石那孤賞此際園林懶獨誇有信轉憑鴻鴈翼
開樽愁對棣棠花清朝出處依心事垂老篇章惜歲華

上苑只今春草發可能無夢向天涯

上劉少司馬朝宗二首

即看恩許鑑湖濱猶憶先朝寵命頻
綠野舊為開府地赤松今是避侯人
囊中大藥時時裏篋裏陰符字字論
解道蓬蒿三徑合可容雲色礙蒲輪

其二

中丞鞭淨鬱藍迴將作雲連嶺
嶼開三疏暫歸橫海節
百年誰似補天才
僊芝玉朮扶調鼎
沆露漿霞引壽杯

賸有丹衷懸魏闕將因起色上吳臺

得大名報後上疏乞休

十年垂釣卷空綸主聖能容草莽臣蕙帶不諳朱紱好
衡門翻怯紫泥新傳來似是天雄節到了酬它地肺身
一掬松楸清淚滿可容揮灑向京塵

其二

病驚除目到滄洲懶愧浮名入帝州一物轉勞天地德
餘生不傍古今愁徵車罷後殘黃犢退艤停時穩白鷗

但語世情吾任老即妨身計總何求

張仲立茂才過訪夜談甚洽晨出候之則衝雨發舟矣貽詩見報率爾為答

看君年似棄繻生琢得新詩字字清
遙夜星河迴促席
詰朝風雨失連城
去來非是輕中散
爾汝終應屬正平
但使案頭行卷在不煩攜手見交情

送汪中丞伯玉游太湖以病不能偕

自是中丞愛拍浮得歸天許五湖游
行空日月開雙鏡

欲雨乾坤共一坏此去鵲夷堪獨賞暫來羊仲不相求
知君盡識人間字龍室真文可借讐

送滇人周廣文校士關內

絳帳如雲海國開公車還復領羣材秦庭忽動連城色
漢馬多從西極來題罷金天霞作掌飲殘清渭月為杯
奚囊定有懷滇句知向昆明沼上迴

于鱗子與以詩勸駕有答

倉皇家卹始辭官敢向東山擬謝安起色江湖才欲盡

壯懷天地事仍難中原縱自容方軌滄海何當足釣竿
神武至今冠尚在可煩霄漢故人彈

夏日歸莊居即事

抱病城居暑不辭暫歸風物總相宜家家餉耨盤游飯
處處行歌鼓拍詞水暖魚蝦俱氣色日長雞犬亦熙怡
葛巾踈罷無勞裹遠近垂楊護酒旗

其二

聊將物色供吾廬懶性何妨但索居遙夜蛙池饒鼓吹

乍晴蝸壁也詩書牆低過雨分
猫筍市小腥風上鱗魚
若到長安逢襴襪為言田父定何如

贈梁將軍代郭都督

璽書清夜下明光主聖鯨波已不揚
卻問中權諸部曲
何如舊帥郭汾陽
旌旗半掩三江日
組練俄飛五月霜
揖客幕中何用借
自揮長檄定扶桑

題梅石卷贈蘓生

君今幽興何所寄
日坐磐石梅花傍
一峰兩峰洞庭古

千樹萬樹羅浮香
平泉莊畔酒初醒
卻月觀頭人欲狂
何似儂家新塢就
不須遙羨白雲鄉

題松雲卷贈王明府

君侯燕坐琴堂上
琴底雲生萬壑松
松愛羊眠時借色
雲憐罨靄不辭封
三江地僻催棲鳳
二室天空起蟄龍
服餌異時須待汝
為霖今旦莫從容

子與追于鱗不及喜余後至有作遂成和章

與君誰共帝城游
中路搏風有去留
幸不興闌王子棹

何須身在李膺舟，揮毫島嶼青從逼。
握麈星河絳欲流，解道延津容易合。
可知真宰為他愁。

吳興俞生者，雅士多長者。游晚得疾，甚困而貧，獨與其所幸美人居沈伯麈為圖之。予詩紀焉。

消渴文園竟若何，雪川秋色卧游過。
門前舊客隨金盡，鏡裏新愁上鬢多。
空觀不妨天女侍，小詞猶要雪兒歌。
君看阿堵神明在，遮莫雄心未耗磨。

病中于鱗過訪海上

高枕吳山氣忽青柳邊初繫越江舲因過海若無秋水
不謂風塵有歲星強起精神催振動欲眠談理破沈冥
十年朋舊知多少論向人才指自停

常州道中逢王百穀

微名總愧尺書求況遇相如已倦游席帽初拋燕市日
隱囊徐坐晉陵秋人中變色偏談虎老去全身且應牛
縱得量移君不羨好攜雙槩待滄洲

秋日諸君餞焦山作二首

浮玉峰頭高振衣放歌天籟入虛微波迴片片青蓮出
日落山山彩鳳飛一往薜蘿人自古重來冠蓋事還非
閣黎莫恡談經席已向君王乞釣磯

其二

江頭是處青山好為念焦君破浪來一字光能爭日月
千秋氣與結樓臺潮聲吳楚中原盡海色東南太古開
歸棹去帆看莫指壯懷今夕付銜杯

過歐廣文苜蓿齋與子與同賦

少年誰逐廣文游
苜蓿盤空且為留
暫割半毡遺子敬
還將一榻下南州
抱來和壁知難夜
彈罷嵇琴別是秋
莫恠相逢誇鄴客
至今何處儼風流

即事戲呈子與

中朝露刺候轅門
何似清齋卧給園
海內詩名猶嶽立
淮南幕府若雲屯
折腰亦是書生事
垂手應為國士恩
白雪至今驕不得
青雲依舊傍他尊

過故胡都諫祁禮作

兩朝華省見風稜萬死孤臣氣轉增
枕草半沾憂國淚飯蔬分供坐禪僧
人才論後多中駟佛意明時失小乘
不信宦情夷甫薄期君寒色對篝燈

渡小淮口大風和子與

千里清淮匹練同飛沙忽掩夕陽紅
雲君鼓吹冥濛外河伯旌旗杳靄中
扶病自驚枚叔壯放歌誰奪楚王雄
維梢坐對宣城酒回首人間萬慮空

徐州別楊大應武試

楊都督子

戲馬臺前酒一卮
翩翩結束帝城宜
縱橫立取連城壁
蹀躞飛騫上將旗
三日定非吳下呂
九重偏識越公兒
他時過里銀黃並
莫忘推蓬夜雨時

于鱗返濟南追之不及作

看君匹練出吳閭
忽爾雙旌指濟陽
長河不散真人紫
落日時憐我馬黃
欲取延津為海色
還愁太岱壓秋霜
登龍廻坂皆吾事
躑躅孤城淚萬行

觀瀾亭枯蓮

月冷亭蓮秋思深半池病碧半黃侵歌殘白苧香猶在
褪盡紅衣態不禁愧爾漸非初服地憐予同抱後時心
江南子夜偏饒景愁絕霜風何處尋

過新河呈大司空朱公

日出烟空匹練飛大荒中劃萬流依連山盡壓支祁鎖
逼漢疑穿織女機九道徵輸寬氣象六軍容物迴光輝
甘棠欲讓金隄柳曾護司空卻蓋歸

其二

兩朝三錫璽書專自失流言格上天功似立熊官百揆

渠名龍首帝元年

功成於隆慶元年

飛艘雪擁吳都稻繫竿波

穿少府錢長孺於今稱社稷當時鉅野總茫然

寄耿中丞子承

秋風代馬飲灤河長狄霜椿魯將戈魏尚豈應飛捷誤
樂羊無奈謗書多匣中龍色思雷雨檻外鴻心問尉羅
駿骨祇今身便是不教伏櫪怨蹉跎

八月抵魏中恰計舊游之日滿一紀矣為之興歎

八月丙辰吾使魏戊辰茲夕月仍看窮愁雪暗侵雙鬢
懶病天催寄一官屈指舊游人漸減拊心歸計路仍難
淇園脩竹刊垂盡擬向何方選釣竿

履大名任作

按章三輔獄能空始向東方引畫熊一疏去為吳市卒
十年還試右扶風沙頭竹馬拋寧在郢手風斤老更工
稍待縣官公事了步兵還擬醉江東

故少司馬楊師邀游城南別業四首

回首虞卿解印年自將耕鑿答堯天烏皮總是看山几
白水俱成負郭田別墅圍棋同謝傅後堂呼酒勝彭宣
嚮來何限橫經侶寂寞誰當問守玄

其二

羊腸歷徧始回車燕尾環流定卜廬橫海尚傳楊僕戰
徙陶仍用計然書池荷拆露珠從落隴稻排雲錦盡舒
二頃秣田應不少高陽門客肯留餘

其三

醉裏輕舸點暮雲悲歌伏櫓不堪聞青山暗授流言指
白日平將戰色分魚鳥看來曾是陣鸛鵒驚處莫言軍
江南匹練全堪展何必麒麟更寫勲

其四

高枕衡漳十四春尊前論舊各憐身何當絳帳傳經客
也是青門學圃人一醉鄉心時自起五湖秋事未全貧
少微中夜應難辨來日風塵礙角巾

望五臺山初雪

夜盡千峰紫更玄雪山俄覺曙來先青獅坐改文殊地
玉竦橋橫大梵天會見九邊消戰色已從三晉兆豐年
停鞭詫有陽春在無奈王猷興黯然

龍泉關

層巒不盡鎖氤氲劍氣時干北斗文浩蕩天為三晉黨
清涼水自五臺分關如趙壁常完月嶺似并刀欲剪雲
總為山河能表裏薊門何限羽林軍

寄王明輔憲長

吳洲草色在離杯
塵海俄將萬事催
我出終為尋壑計
君歸還是濟川才
談時鵬鷃輸莊叟
歌罷龍蛇惜介推
倘道徵書不解下
何因馬骨上金臺

謁北嶽廟

祠壇縹緲過雲孤
肸蠁英靈颯有無
象應星辰天北極
氣蟠龍虎帝神都
羞從禪代論金檢
喜向侯邦乞寶符
混關將何酬聖主
祁連不遣祭休屠

其二

鬱盤河朔古今雄
柴望千秋禮數崇
黑展靈旗開水德
白飛穹石見神功
尊同四嶽非真拜
秩比三台是寓公
嶽在渾源州
此遙祭也
聞道率然元爾陣
可無風雨淨遙空

娘子關有泉穿大壑
下勢雄甚味冽而甘
夏冬不冰
居人賴之

飛泉中瀉九關開
朔氣偏催萬壑雷
噴玉高從西極下
擘崖雄自巨靈來
地輸神漢為湯沐
石拂鈞天奏帝臺
若語會心翻自笑
羽書初過黑龍堆

將入黃榆度水門峽最逶迤險絕處也

峰排瀑挂峽垂傾日薄烟霏徑自生破險旌旗俄滅沒
出幽天地頓崢嶸源桃欲問秦人隱細柳先屯漢將營
慷慨不堪頻指點帝京南去是長城

榆嶺傍峭壁際天中有懸泉如柱玉下匯巨澗

飛泉圻漢寫崔嵬倦馬驚逢首重回絕壁倒看銀綆墜
高空橫散玉繩來關竒汗雪長凌夏峽急崩雲自起雷
一酌吾寧逃潁客即看汝豈住山才

登黃榆最高處

太行無際碧天愁，榆塞褰帷萬古收。
紫氣東盤滄海出，黃河西抱漢關流。
橐韃忽動雙鴻瞑，刁斗頻敲萬馬秋。
薄伐到今仍列戍，教人無賴說并州。

其二

托御當年惜未同，叱車今旦指秋空。
千峰競吐差峩日，萬木長交慘淡風。
滴博高疑唐舊戍，虎祁遠是晉新宮。
亦知雷雨非全妬，不遣人間句並雄。

十二年余使順德于鱗約游此為大

雨所
阻

少司徒清豐呂公枉駕見訪即席有作

十年天地竟何如回首滄桑感慨餘之郡未懸徐穉榻
應門先報呂安車休論白眼狂時事且出青山著後書
郡酒便如漳水濁可能相見不躊躇

贈少司徒清豐呂公

當年青瑣獨批鱗主聖能寬萬死身見厯風波垂百折
到來霄漢是孤臣淇園午色攤書卷漳水秋聲起釣綸

自是非熊堪入夢，郡樓長盼屬車塵。

初冬日於邯鄲叢臺餞朱太僕

天寒大陸吐叢臺，倚酒雄風亦快哉。
紅日迴從漳水墮，白雲紛阻太行迴。
空城竟暮無鳴瑟，俠客千秋付舉杯。
此去君王須問駿，莫言曾見劇辛來。

登馬嶺關口

迴崖宛轉異晴昏，片白浮空列戍尊。
一線地排為北戒，雙輪天捧作中原。
頻端噫氣千崖拆，木杪蒸雲萬古屯。

我欲著書從此逝毋煩令尹候關門

許殿卿左史有悼內之戚請告歸里賦此寄贈

休沐周原可憚勞悼亡潘鬢轉蕭騷烟霞不逐長裾老
霜月還依擁傳高暫去臨邛無卓女將歸梁苑有枚臯
乘小婦子也君看醴酒緣誰設莫向春風戀濁醪

履魏三日受筴易州行府承諸公為會高臺有作
秋聲忽傍羽書寒易水蕭條鴈影殘今日和戎無魏絳
當時結俠有燕丹府僚高宴從軍樂客子悲歌行路難

莫向舊臺稱買駿倦游無計可辭官

登黃寺堡太平樓作

秋風列戍滿邢州敢為籌邊獨上樓千騎月迴清嘯響
一尊天豁大荒愁移屯漸老韓長孺作客誰憐馬少游
出處聖朝應易得即論非土竟誰留

真定謁大士像十二年矣薄暮復過此留題

中天飛剎逼星辰曾覩蓮花法像真千劫不貪調御位
十年仍現宰官身恒河暝借金篦指大鹵雲爭寶髻新

彼岸祇應容爾度可能無意問津人

真定陳使君邀飲大悲閣

恒陽霜後洗差莪寶界橫開宰堵波萬里悲風吹大陸
千山落木下滹沱尊前暝色靈鷲破坐裏邊聲法鴈過
不是摩尼能夜炯自來和璧趙王多

寄謝茂秦

罷醴誰堪鄴下居世情秋共鬢毛疎家移潞子雲邊國
門少梁王雪後車歌罷此生唯短鋏賦成何地不長裾

漳流轉自并門上可恠天南斷鯉魚

調方景武方長僅三尺而為戚大將軍幕客

寬裾乍曳薊門塵曾覩新篇動七閩名似要離那恨小
請同方朔莫言貧東門此去無長狄上帝由來有弄臣
見說府公難喜怒可將書記屬王珣

得謝茂秦寄新集時孔汝錫馮汝言二公為刊定
十載蘭心托路岐凌雲綵筆健誰知還尋玄晏先生序
共表邯鄲幼婦辭不盡交游天並老重來作者世應遲

君看黨錮中興解可忘龍門御李時

長至夜起坐憶家

一枕鄉山路未真篝燈起坐獨傷神天心肯傍微陽轉
物色從爭朔氣新久客愛聽初減漏喚班羞作未歸人
江南兩地俱愁寂總向天涯話病身

時舍弟在金陵
老母山妻在家

東明送別邵侍御子元

濁酒郵亭感慨頻知君此去有埋輪乾坤不盡開時色
霜雪長含至後春賈傅總能憂聖主鄭公元自愛良臣

人間大有澄清地豈必滄波問逆鱗

雪後同楊少參張山人分韻

連城十二吐明光極目千村混渺茫微雨忽扶鳩鵲出
峭風徐起玉虬狂歌成郢曲人為宋賦就相如苑是梁
擬向瑤池看戴勝不教晴旭捧扶桑

右得光字

其二

飛甍雪霽擁岩堯睥睨光凝迥未消白鳳羽從全魏落
蒼龍髻挂濁漳遙

萬里一白
河流蒼然

褰帷秀色崢嶸至信馬寒

聲鑿落驕卻憶西山多氣象千官挂笏紫宸朝

雪夜使院有感

雪色將風警獨愁不眠中夜攬貂裘層關七萃歌黃竹
故里文君咏白頭宦路艱如秦嶺騎客情輕似剡溪舟
漁燈社酒真堪托何必征途始倦游

雪後十日始大晴喜作

十日雪陰今日晴北牕旭紅吾眼明樹頭玉花故片片
簷底珠雨時聲聲總愁千村露搖落暫喜二候還澄清

放衙蠟屐何所念石湖湖頭雙槳橫

寄鄭山人若庸

平臺賓從悵離羣歲晏鴻書喜乍聞太守可題通德里
故人誰是信陵君鄴中玄醴寒於水稷下雄談逞似雲
俱道少年輸濟勝青囊肘後若為分

寄吳明卿

十年調笑殿中郎郡閣空傳下鳳皇天到七閩猶未盡
人過五嶺向誰狂青雲究至疎詞客白雪於今滿瘴鄉

總為明時應少住莫教寒色甚瀟湘

中山遇羅參政國華自薊鎮被言調歸

屈指層關百戰餘運籌開府幾人如寧因大漢無長策
自是中山有謗書千帳寒聲爭伏匿七陵佳氣擁儲胥
篝燈欲竟防邊事怕遣霜毛一夜疎

謝中丞翁公孺參

憲府寒開濟上春百城公吏望清塵縶韉不動趨庭色
杯酒還叨入幕賓末路雕蟲驚眄睐當年塞馬出酸辛

投君明月尋堪掩何處能無按劍人

承于鱗為先公作傳將勒石墓道聊抒鄙感

攀栢千年黯自悲九京心事向誰期
新題季子延陵墓不數巾郎許下碑
震澤濤聲寒雪涕天山冢色卷雲旗
江南倘有迴鞍日更與重披絕妙辭

寄懷岑紹興允穆

憶爾飛書請尚方一時風裁許誰當
丹心畫捧丹山日白簡春生白下霜
總為馬遷奇禹穴不教長孺薄淮陽

蘭亭禊月仍堪賞倘有新編可寄將

途遇徐寧波遷廣臬率師平寇有贈

即教甌越威南越故轉寧波號伏波五馬春將時雨去
千帆秋破瘴烟過折衝樽俎誰堪擬治郡功名業已多
此夜相逢便為別欲翻鉞吹入離歌

寄楊伯章提學

曾向蘭臺挹御芬中原桃李又歸君房心好映三台象
河洛仍開萬古文經術相家韋氏擅秀才門客漢庭聞

應知大夏須梁棟二室長松有卧雲

弇州四部稿卷三十九

欽定四庫全書

弇州四部稿卷四十

明 王世貞 撰

詩部

七言律八十八首

己巳大名元日試筆

馮扶帝里未全遙物色王正喜更饒四海三新隆慶朔
百年兩見孝宗朝條風應候吹仍暖臘雪留祥炯不消

一酌椒花還自慰頗聞遷地近漁樵

于鱗自浙藩遷長汴臬時予實為代有贈

十年清泌未蹉跎已見三臺歲裏過盛世詞壇牛耳在
中原宦跡鳳毛多梁園再起千秋雪汴水遙增萬里波
薇省至今江左地代興公意竟如何

正月十六日于鱗會于齊河挾一生為姑布術者
天涯得代非為遠元夕初過尚勒春小酌可成燒尾宴
壯心俱付耗磨辰原無蔡澤輕肥想自喜桓倫厯落人

不是誇君輕去就五湖生事未全貧

是日為
耗磨日

過滁州贈太僕簿許元復

郵亭徙倚對斜暉宦興如君可不微
小吏時時牽馬過新書種種換鵝歸
蒼山跡憶環滁古青史人堪擬峴非
勝具自來饒許掾莫教春色負褰衣

渡江天界寺會舍弟作

北風歸騎卷黃埃柳色江春一棹開
厭俗聊依天界住參方端為世親來
曇花暖借荆花發鴈塔高騫鴈序迴

任使遠公饒酒戒可能相見廢銜杯

渡江承吳中丞惟修出訪有贈

二月江春霜色寒俄聞驄馬出臺端
借來漢劍環同賜
哭罷秦庭璧遂完
一代風稜南史筆
兩朝天意惠文冠
孝陵只在鍾山裏
紫氣千秋仗爾看

鶯脰湖洗天亭月夜與公瑕子念王復舍弟飲別
湖光天色澹相和
今夜離筵樂更多
雲作翠屏裝寶鏡
風為金斗熨青羅
尊前鸚鵡知衡在
曲裏含桃李鄭何

一水峭帆歸便得不須低首怨驪歌

其二

為爾狂歌思欲飛
壺中天地到應稀
玉山偏軟烏程酒
銀露徐欺白苧衣
月色總依雙旆在
風流俱逐片帆歸
西湖自好誰行樂
始信浮榮有是非

錢塘遇江侍郎順之南歸有贈

江上逢君對莞然
自矜揮手秣陵烟
兩朝傾捧心長赤
八座歸來鬢尚玄
天意筆留常侍在
主恩車借大夫懸

故人潦倒仍趨府
愁記含香並署年

履省任後之吳興部戲作

縱然名姓墮塵寰
身比闍黎可較閒
錫杖乍飛天竺寺
芒鞋還踏道場山
三生公案聊須檢
十部除書了不關
細雨斜風應便住
故鄉原在一帆間

自吳興寄于鱗大梁

憶醉齊南白玉壺
浮雲天地為踟蹰
高名自汝中諸嶽
傲吏堪誰長五湖
亭午夷門過結轡
乍晴茗上有歸艫

他時大陸儀鴻羽回首中興意未孤

由錢塘門度六橋堤

拂憶鶯啼出谷頻長堤天矯跨蒼旻六橋天濶爭虹影
五馬颺輕散麴塵碧水乍搖如轉盼青山初沐競舒顰
莫輕楊柳無情思誰是風流白舍人

夜登吳山訪紫陽庵即事

吳峰頂畔市烟霏裁脫紅塵便翠微城外春山城裏色
樹根流水樹頭飛逶迤踏月疑沾屨窸窣藏雲暗濕衣

解道丁家留鶴蛻至今華表未聞歸

同年馬通政吳太常顧沈二臬及凌守要子與蔡
憲使飲太虛樓

不須槎上訪蓬萊咫尺雲霄法象開挾日千峰凌睥睨
浮天萬頃浸樓臺西泠棹影烟從破下界鐘聲晚自來
十載故人塵外景醉翁寧為酒徘徊

岳王墓

落日松杉黯自垂英風蕭颯動靈祠空傳赤帝中興詔

自折黃龍大將旗三殿有人朝北極六陵無樹對南枝
莫將烏喙論勾踐鳥盡弓藏也不悲

飛來峰

濤聲不斷舞蒼虬忽爾巔岼萬玉抽劫盡修羅移佛土
願深阿育湧南洲懸崖宛轉疑龍藏疊嶺騫騰盡驚頭
自有真如飛不去幻軀天地任沈浮

玉泉寺觀魚

寺古碑殘不記年清池媚景且留連金鱗慣愛初斜日

玉乳長涵太古天
投餌聚時霞作片
避人深處月初弦
還將吾樂同魚樂
三復莊生濠上篇

北高峰望大江暮歸即事

捫蘿直上驚峰頭
縹緲平沙瞰碧流
匹練中分吳越地
雙高對表帝王州
憑虛霽景驕相襲
入暝湖光炯不收
扶路嘯歌那覺晚
麗譙清響滴銀虬

游南高峰

從游指點南高峰
躡屩攀蘿興不賒
畫裏餘杭人賣酒

可以望餘
鏡中湖曲棹穿花千巖半出分秋雨一徑微

杭城中
明逗晚霞最是夜歸幽絕處疎林燈火傍漁家

山行至虎跑泉庵次蘓長公石刻韻

百草沾風蠶月香雙鳩喚雨麥秋涼過橋已覺世情少
到寺始知僧日長拂蘚石留行腳偈挂瓢泉是洗心方
良公更有茶瓜在禪悅能容取次嘗

游淨慈寺

寺數煨數起有五百
羅漢堂雙泉芙蓉洞

擁刹芙蓉翠欲翔拂雲雙練吐寒香十千乾闥婆天樂

五百阿羅漢道場未必應真超劫火還因勝地屬空王
南園實傍珍珠墅指點烟蹤並渺茫

與諸公攜酒昭慶戒壇陳少參從僧講律儀口嘲
白蓮社前倒玉甌僧將戒律宰官聽三車菩薩何妨聖
五柳先生不愛醒家家湖水門前綠處處春山雨後青
識得此中無染意波旬能唱梵王經

送比部吳樞季之金陵時舍弟在儀部

東山六月下何遲此去風流建業知行李夜投朱雀巷

墨花秋染白雲司棠陰故郡迎舟出槐色清人抱案移
欲覓陽春春署在儂家團扇是新詞

贈潘中丞時良嘗視北畿學按部南中

十年華省隔鳴珂驚見勲名霄漢多攬轡馬羣空冀北
按章霜色掃牂牁中丞餉道專持節天子宣房寵賜歌
何似君家潘博士蕭條拙宦二毛過

邀中丞潘時良大參陸理之登峴山作

峴山雲鎖玉璘珣窪頂尊開興自新名勝東南元此地

文章潘陸更何人
平湖漲起高青雀
刺史吟成老白蘋
鰕菜吳興知不貴
過從休惜郡厨貧

陸大參別余與潘中丞登飛英塔

招提只在白雲封
絕頂峩望莫從忽
有丹梯通箭枯
還如玉井護芙蓉

塔中空如井
有小白塔

菰城午色烟爭裊
菖水

春流雨自重可道
諸天無別思
愁君明日度千峰

袁魯望考功奏最
不上與舍弟留飲
白下賦此促之

三月朝天理傳車不將留滯惜居諸清曹愛弟難為別
上考知君已自書酒盡長干須策馬花明幕府又牽裾
何如且作移旬去鱸膾蓴絲到有餘

黎惟敬內翰自南海訪余吳興登峴山分韻

為具青山莫厭貧天涯驚見賞心人還將溫室中郎樹
來咏吳興太守蘋

君嘗侍中

雪水遠拖雙帶玉何峰斜抹一

鈎銀明朝塵世應誇取未必蓬萊事事真

得蘋字

其二

峴山亦是關情地，屈指從君話舊長。此夕梅花辭大庾，
十年秋鴈隔清湘。應徐筆底多陳跡，吳粵尊前暫一鄉。
披蘚為磨方石在，祇憑詩句敵襄陽。

得湘字

贈別惟敬北上，兼簡梁舍人

渺渺吳江西逝波，峭帆風緊奈君何。遇來龍劍無長合，
裁就驪駒未忍歌。雞舌可沾供奉賜，鳳毛誰較舍人多。
中朝舊是誇聯璧，曉對雙星白玉珂。

送長谷徐先生赴羅僊翁約煉藥玉陽山房

青鳥銜書向辟蘿下元今日上升多西行侍者還徐甲
無上僊人是大羅玉柱故應句曲有瑤箱只待阿環過
三天倘草諸公制誰應宏詞第一科

其二

聞君擬煉大還丹與唱僊家行路難空裏雲車騎欲墮
風前石髓健堪餐胡髯日射黃金鼎蛻骨天遺白玉棺
何似羣羅藏宛若年年春色醉長安

峴山贈故孫憲副

十年歸汎五湖舟蓬鬢條然守一丘家似桃源非避難
身如桑楚更奚求紫衫不解為何物青眼唯將向舊游
好語吳興諸掌故峴山今日重風流

寄陳太常廷裸

帝念先朝折檻郎徵書賀色動明光還將白簡酬青瑣
不厭清齋守太常天峻容臺多日月夜嚴宣室傍星霜
未須論到波臣事推案看山也自強

御史大夫南充王公俯為先君子作傳悲感之極

情見乎辭

中丞自握如椽筆絕勝班生在石渠片語褒能光日月
千秋事敢借吹噓從看京兆阡頭草長護延陵墓裏書
縱有鮫人一掬淚不堪持報愧恩虛

寄贈楊錦衣今太宰公子時上以秋日大閱楊當
扈從

左纛明月繡螭弧右腋連星銀僕姑別賜戟門丞相里
新從緹騎執金吾山西將帥古來有越公兒郎天下無

奪得頭標還草檄君王宴鎬賜醪醕

同年彭子殷貽詩見寄君令新淦三月而調郎白
下一歲而免

屈指行藏轉自嗟讓君今日弄烟霞千秋建業歸時草
三月河陽夢裏花攬鏡清霜爭歲色題詩白雪失天涯
江州鹵簿由來簡倘許相攜過酒家

柳洲亭即事作

紫微分館曲城阿碧甃朱欄奈勝何一一芙蓉爭插漢

雙雙舴艋戲回波
烟將暝色歸薤薤
風引歌聲出菱荷
今日吳興使君道
柳洲佳較白蘋多

送范狀元伯禎召入尚寶時君鄉大水予方有疏

請卹

先朝開殿策賢良
第一鵷班侍玉皇
僊籍謫來唯太白
歲星收去是東方
西清共識含香吏
中禁仍呼尚璽郎
最是天顏朝暮接
可能垂省度支章

大宗伯董丈用均初度

屈指先朝供奉班
栢梁高倡更誰攀
寧因八座方稱貴
總為千秋暫許閒
吏部文章天北斗
吳興名勝地東山
當時乞取仙桃在
煉得瑤池醉裏顏

宗伯董丈枉飲峴山泛碧浪湖時范太史伯禎陳
都諫體乾在坐太史將赴召北上宗伯遂成一章
予嗣得其二一用公原韻一用近贈公韻

諸賢名價重南州
峴首吳興亦勝游
痛飲爭呼明月至
狂歌欲斷彩雲流
那知碧浪重湖夜
別作金臺萬里秋

我是安期饒落穆過江今日始言愁

其二

承明促入舊仙班此日膺舟尚許攀
返照只看歸鳥樂臨風仍羨去鴻閒
夕郎高議傳青瑣學士清盟向碧山
獨有周南留滯客懶將秋水照顏顏

朱山人見過碧瀾懽飲卻去賦此贈之

醉石先生不愛醒一瓢初過碧瀾亭
那無令尹占真氣忽漫吳興下酒星
鬚似蘋洲憐我白眼如茗水為君青

何當夜半揚舠去與報牀頭雙玉餅

覽何使君振鄉所編游名山記有寄

筆底青山杖底知書成不數子長竒雙峰太華真如掌
萬里岷峨半入眉婚嫁向平何日事卧游宗炳暮年期
玉京人鳥須彌頂更有新編擬付誰

胡通參汝臨枉駕雪中夜坐有感君在獄十年而
始出嘗同難者

握手青燈夜色孤欲談千緒見來無那將薄祿羞牛後

且為餘生記虎鬚出獄劒文寒自好酬恩珠淚暮垂枯
人間似有風塵意究至鷗夷識五湖

候臺使自餘杭安溪登陸抵縣郭即事

老去逢迎損壯懷祇憑游目未全乖黃綿覆壠家家樂
碧玉圍城面面佳地僻官曹寬禮數溪清漁網鬪生涯
方平自詫餘杭酒那有青帘插柳街

寄汪中丞伯玉時以錄闕功賜金幣特詔推用

一書天散五湖蹤回首黃山意萬重我出未應終誚鳳

君歸爭已識屠龍弓藏戰伐身猶在鼎立文章代偶逢
俱道雲中須魏尚馮郎占對帝從容

其二

至竟徵書及謝安風塵差不愧微官千金為駿聊先骨
六月搏鵬暫養翰聞道解衣明主在須留負弩細君看
烟嵐瘴海還生色銅柱當年墨未乾

送四明周廣文之襄藩紀善

冠蓋錢塘雅自雄青衫憔悴出江東曾陪謝監觀滄海

更向襄王對大風薦草功名微祿外曳裾心事倦游中
惟來枚叔耽梁苑應為人間眼未工

九日省中諸公邀游兩高遇雨不遂小酌靈隱

秋山鏡吹擁登臺龍藏含雲鬱未開天際兩高風雨色
客中重九弟兄杯茱萸插罷偏成感竹葉飛時不待催
昏黑上方那可到諸君虛有大夫才

同年吳太常馬通政顧憲副沈憲僉邀楊大參共
汎西湖分韻得遲字

輕筵單舫事相宜促膝論心好自知湖水雅如交意淡
嶺雲徐共宦情遲尊中醴色呼顏轉坐裏談鋒逼景移
努力浮沉俱自愛與君能復少年時

題馬大夫九里松隱居

偃蓋垂髯一萬株鬱葱佳氣冠江湖長依漢地三天竺
三天竺寺路也不數秦時五大夫永夜濤聲遙自合高秋嶺色
未全孤無勞白眼輕人世雨後芝苓好更鋤

其二

雲物蒼然溺不開中原真欲壓徂徠龍鱗日聳天朝幹
烏尾霜訛御史臺半嶺只聞鸞鳳嘯百年誰辨棟梁材
饒他新息封侯好楊柳蕭條曲易哀

大司馬張公惟靜著皇明文苑成復為先公作誄
敬賦以謝

不煩分洛見經綸泉石清時業自新四海文章歸藻鑑
九朝人物借陶鈞歌中春雪元無敵字裏風霜若有神
痛殺宣城遺烈在中興一頌有名臣

大宗伯董文用均用前押韻三章見貽惜別陳懷
徵之夢寐至云遙想六橋冠蓋集知無一日酒杯
閒又云水國共憐門似水山神應望屐登山其托
羨湖山寄好風雅真無匹矣復以三章追輓先君
子奏之松栢之間霜飈驟零真足腸斷不揣輒復
和謝依來數其亂篇專志哀感知鑒泣烏之私不
以續貂為誚也

先朝詞客勝揚班地近烟霞許暫攀高卧不招衰鳳歎

中興翻覩伏龍閒遙飛郢里歌中雪恍踏苕溪雨後山
却恨南尋夜深路祇令如鏡映離顏

其二

徽省虛塵列戟班金莖露表迥難攀身從手板聊稱賤
意托爰書可廢閒不分歸入私日月唯堪到處有湖山
新詩看灑齊紈滿歌到涼颿一解顏

其三

詞客蘭臺舊姓班此成松柏慟堪攀非熊自枉車中載

汗馬那容牖下閒人向九京迴白日天留三管施青山
痛來南北風塵思不入麒麟將相顏

西亭王孫許殿卿左相遠寄牡丹芍藥賦此志謝
牙牌占彩貼紅紗嫋嫋雙莖欲努芽玉案遙將漆洧水
金盤絕勝魏姚家分從漢掌俱沾露種出梁園不讓霞
為報江南佳麗甚王孫春色到天涯

題月溪卷贈時生

月色溪容雅更宜石門蘿屋好棲遲溪稱愚叟元非辱

月與幽人故有期
入牕銜流澄似練
當秋濯魄澹如珪
君知天地元無係
卷裏烟波手自隨

送董原漢之南光祿卿

璽書仍下泖湖潯
綠鬢卿曹豈滯淫
四海舊傳三傑疏
一官今見九朝心
冰霜省署真無改
雨露園陵意轉深
欲問長安望中色
鳳皇臺上有晴陰

遷晉臬柳洲亭別省中諸老

五馬踟躕立翠微
與君何計不分違
江南佳麗如杭少

海內交游入晉稀坐惜殘更仍進酒歌當別調易沾衣
湖山處處留人色祇是浮雲出未歸

移晉臬將發寄別黃使君執甫及諸僚友

乍聞移晉事還真虛說旬宣長吏民抗疏未能寬白屋
除書終自忝朱輪腰間罄折官無改眼底流亡淚轉新
努力羣賢須好在古來長孺是何人

用晦宗侯余德甫憲副寄詩貺問兼致先公輓些
賦此奉酬

章江江北彩雲流總有連城客未酬五馬長拋持節使
雙貂不愛侍祠侯招魂有些還呼只敵手稱曹好配劉
絮酒莫驚千里近由來故事在南州

其二

歲晏淒其意自憐懷人鴈素劇連翩名從鄴下風流得
法向梁園雪後傳斗夜忽飛雙劍至星江元待一犀燃
君看不朽千秋在莫問區區失馬年

湖上草堂為德甫賦

負郭堂成萬象開使君真有五湖才
西山雨並踈簾挂
彭蠡烟從返棹來
過客偶裁漁父對
當歌不避海鷗猜
何年一繫青絲竿
與瀉流霞三百杯

灌息軒為用晦賦

西園公子安足奇
漢陰丈人真我師
忘機頓覺天地濶
息意不受風雲疑
汲罷蛟龍歸曉甕
灌餘鱗甲長春畦
朱門信是絃堪絕
為爾仍翻流水辭

庚午元日試筆

今旦江城景物饒珂聲亦似帝鄉驕尊前萼媚連枝棣
頌裏花傳故國椒五夜星辰迴紫極一宮南北係清朝
祇憐霜色時留鬢見拂春風也未消

庚午元日日有食之

甲寅元日雨不食庚午正元食稍微稱賀先朝無抗表
省躬今聖有垂衣金輪萬象光旋復玉珮千官護卻歸
拱極葵心應稍慰當尊栢酒莫教違

子與久宦楚中貽書見訊而余有晉臬之除賦此

奉答

東西歲晏走除書轉覺徐郎姓字疎
薄劣偶先燕市駿
羈棲寧為武昌魚
臺中白簡霜容老
湖上青衫草色如
莫向井門頻問訊
病夫無意太行車

奉題龍沙草堂

高帝歌風帳宴除
至今龍護子侯居
星空紫劍時雙犯
雨暮朱簾宛自舒
地僻長沙旋舞袖
國貧鴻寶出藏書
靈光莫問王文考
八斗君才故有餘

張山人游吳留一月以詩畫為贄賦此贈之

南中平子雅三絕來向吳江歌四愁自謂暫因雙鳳住
不然歸作五羊游玉壺小醉閨門月銀管長驕藝苑秋
莫問區區借名姓此生端擬不驚鷗

寫西湖碧浪諸詩付瞻美因題其後

吳興使君清且尊時復錢塘領畫幙月夜小維浮玉島
花朝已踏湧金門官移西北天雙戒家傍東南水一村
不論長卿游果倦可能無疏乞田園

春日感興

稱病江城絕可憐，入春風雨妬朝暉。
揮絃杳杳過黃鵠，步屨萋萋逢杜鵑。
萬卷世仍看長物，一歸吾自制殘年。
東鄰社甕芳醅滿，且向花前索醉眠。

故河間守史公顏其庵曰蠹祝京兆為題卷文待
詔賦之會其卷失去而公之嗣鴻臚尊丈命予追
書以補予素拙於筆且吳下能為文祝家書甚衆
史丈必以見屬者豈謂不佞亦有杜征南之癖耶

故不辭而題於後

人間長物是雕蟲爾為三餘故不同蹤跡汗青科斗後
生涯垂白豕魚中綠窻明月應猶在芸簡芳烟舊已空
曾蝕神仙三遍字可隨蒼蝶寢春風

吳君家黃山中即其地別號鳳源於是尤子求寫

圖贈之而予系以詩

尤號鳳丘
余鳳洲也

黃山七十二峰色中有一峰成鳳皇鼎鼎飛泉出丹穴
雖雖中石諧清商蒼梧翠竹結終好五彩九苞誰為藏

長離寫圖鵷雛詠好逐虞帝棲阿房

乞休杜門日侍老母湯藥朝來眉顰稍舒知有壯
丹已零落矣為之一慨

春風喚愁愁日親癡坐兀兀動經旬上書解綬不得報
引疾杜門何所陳舊愛酒杯時避手新知藥裏實縈身
朝來問寢北堂美初見牡丹來媚人

其二

中庭殘花欲墮枝瞥見還疑初發時自開自落不成態

乍雨乍晴將殢誰辭病敢言書作癖問醫端誦藥為師
潘輿故里真無恙王馭天涯返恨遲

送百穀應試北上嘗入校秘書當得官不就時予
方上乞休疏

江東才俊數諸王念汝新文復擅場奪解欲傾京兆尹
鎖廳曾試校書郎飛來五色為鵷鷺賣得千金是驕驕
倘問右軍重誓墓為言疎懶合滄浪

王司成元馭轉北露章請告時予乞歸之疏已上

矣賦此奉問

初聞

闕

詔去

帝師元愛赤松游兩都新賦

闕

生自請留

爭似使君公望淺阜幡容易出并州

壽戶侯蔣子宜時以才分間

一

不為東陵戀故封自將符綬授元龍堂前鵲起初成印

席右鳩來欲上筇舞對雪兒矜矍鑠餌成雲母轉從容

清商一部依身老好施吳山七十峰

題夏太常墨竹

先朝供奉去修文，寫竹高名祇尚聞。
筆筆枝頭裊鸞鳳，家家障子鎖烟雲。
乾坤只合留清氣，丘壑端應貌此君。
解道夾池饒勝色，不知原自兔園分。

焦山五鼓起候新月

焦山月出垂五更，呼樽起酌逸興生。
一星兩星傲曙色，千樹萬樹爭濤聲。
偶從缺雲見鐵甕，幾欲騰空凌玉京。
人間好景不易再，況乃別思催縱橫。

金山閣坐候京口酒至

閣坐脩然景色殊
滄波遠近穀文鋪
晴龜戲水綠於染
健鶻粘天青欲無
極望千峰爭日出
中懸一柱擘雲孤
倚闌興劇盼京口
忽有扁舟來百壺

觸暑渡淮寄舍弟

渡江已見鄉心發
及渡淮河重惘然
回首風雲恒自變
出門天地總堪憐
疲駒顧影時時立
畏日驕人故故懸
欲覓舊歡那可得
北牕還許對牀眠

至歸德過故人李憲副子中小飲

握手踟躕坐未安
旋看河斗畏將闌
主人第進鸕鷀杓
稚子爭先苜蓿盤
天入中原真自好
路逢知己不辭難
休追濟上衣裳會
耆舊於今半已殘

贈李憲副子中


見君容貌知君勝
十二年來不識愁
醉裏花奴嬌似玉
伏中蓮勺冷於秋
五湖今日誰爭長
千騎東方並上頭
最是經綸誤人事
羊腸詰曲有雙輜

晨過歸德城西二十里溪蓮盛開喜而有賦

宋州西陂劇可憐
陂中十萬妝相鮮
紅袖欲翻爭自媚
素珠時迸不成圓
微風墮月方沾恨
初日含霞忽倍妍
卻似長門零落後
乍承湯沐扈甘泉

入太行遇風雨回望中原即景有述

百盤天益孟門雄
趙魏山川指掌中
一柱兩繚穿落日
千巖雲腳斷迴風
黃龍倒挾河流上
白馬俄驚練影空
自是壯游尊馭在
不將愁向阮車窮



弇州四部稿卷四十